

**Friday, February 27, 2026**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**REGIONAL NEWS BULLETIN  
(MIDDAY)**



## ASF

AH&Vety Department changtu Minister Pu C. Lalsawivunga'n African Swine Fever (ASF) avanga vawk thi vangin Mizoram sorkar sum hloh zat chu cheng vbc 960 a tling tih a sawi.

He thu hi vawiin Assembly thutkhawma zawhna leh chhanna hunah sawiin, Minister chuan dan angin Ministry ah ASF vanga vawk suat chauhin zangnadawmna an dawn theih avangin Chief Minister hmalakna zarah kum 2024 atanga Mizoramah ASF vangin khuarel chhiatna puan niin, SDRF kaihhraina siam angin ASF vanga vawk thi pakhatat ralna cheng sang 4 zel pek a nih thu sawiin, ASF avanga Mizoram sorkar sum hloh zat chu cheng vbc 960 a tling tih a sawi.

Minister chuan kum 2021 atanga kum 2026 thleng Mizoramah ASF vangin vawk sing 7, sang 1, 912 a thi a, chung zinga sing 5, sang 2, 979 chu a suat a ni tih sawiin, chhungkaw sang 8, 966 in a tuar a ti a, sorkar laipui leh state sorkarin zangnadawmna a zatvea in tum semin cheng nuai sang 3011.26 pek chhuah a ni tawh tih a sawi a. India sorkar chuan ASF vaccine a la siamchhuah loh avangin siamchhuah a nih theih nan theihtawpin an nawr mek bawt tih sawiin, kumin chhungin ASF vangin vawk 6 a thi leh tawh tih a sawi a . South Tuipui Bialtu Pu Jeje Lalpekhlua zawh belhna chhangin, Minister chuan AH&Vety department-ah thawktu an indaih lo hle tih sawiin, Vety doctor post 115 awmah post ruak 42 an nei mek a, Veterinary Field Assistant (VFA) post 144 awmah post 47 hnawhkhah niin, post 87 a ruak mek tih a sawi bawt a ni.



## **TOURISM MINISTER**

Tourism Minister Pu Lalngthinglova Hmar-in Mizorama Tourist Lodge hrang hrang te thawh chhuah aain a thawkte hlawh atana senso zat a tam zawk avangin sorkar chuan siam belh lovin an neih sa chu midang kuta hlan a duh zawk tih a sawi.

He thu hi vawiina Assembly thutkhawm zawhna leh chhanna hunah sawiin, Tourism Minister chuan Tourist Lodge leh khualzin kaihhnawih chawlhna (restaurant) a thawktute hlawh zat atan sorkarin cheng nuai 44 vel bawr a sen lain, Tourist Lodge leh khualzin kaihhnawih hmunhma atangin cheng nuai 25 vel a chauh a lakluh avangin sorkar tan chuan sum lakluhna tur anga ngaih ni si in, phurrit a ni zawk a ti a. Tourist Lodge thenkhat phei chu mikhual la thlen miah lohna te a awm avangin sorkar chuan an neih sa zinga pawimawh zual te chei that a, din belh a tum rualin, siam belh aain, an neih sa te chu midang kuta hlan a duh zawk tih a sawi.

Tourism Department tarlan danin, Mizoram a khualzin pung mekah Tourism Department chuan mipuite hnena zirtirna tur Community Based Tourism a kalpui mek a, hemi hnuaiah hian khualzin hip kawnga theihna nei tha khuate, khualzin ten an tlawh thin khuaah mipuite nena inkawmna buatsaih thin a ni a, heng hunah hian khaw mipuite hnena zirtirna lo pe chhawng theitu tur VC leh NGO-te bakah Tourism Industry-a eizawngte koh khawm thin niin, tourism hmanga an khawtlang leh an nitin eizawmna a puih theih dan turte, khualzin lo dawnsawn dan leh mikhualte chung a that chhuah pawimawhna te zirtir thin an ni. Hei bakah hian Tourist Service providers hrang hrang- Hotel, Homestay, guesthouse, restaurants, cafe, tour operator, tour guide, taxi drivers, local council hruaitute te bakah youtuber leh influencers-te hnenah capacity building programme neihpui tur a ruahmanna siam a nih thu a tarlang a ni.



## MNF PRESS CONFERENCE

MNF chuan vawiin khan Aizawl Press Club ah thuthar lakhawmtute kawmin kuminah Zalenna puan kum 60 pualin lawmna hun a buatsaih dawn a ti a, ‘Zalenna sangber neih hi Mizote chanvo a ni’ tih thupui ah hman anih tur thu an sawi.

MNF Treasurer Pu Lalruatkima chuan zalenna famkim nei tura hnam pasalthate hmalakna an hre reng tih sawiin anmahni hnathawh chawimawina ropui takin an nei dawn a ti a, zalenna puan kum 60 tlin lawmna chu kum tluanin programme hrang hrang buatsaihin an lawm thi n dawn tih sawiin March ni 2 ah a lawmna pui ber Vanapa Hall ah buatsaih a ni dawn a ti a, he hunah hian Mizo Hnam thinlung pu zawng zawngte chu kal vek turin an sawm thu tih sawiin Diamond Jubilee puala Lungphun hi Mizo Hnam Run kawtah phun a nih dawn bakah MNF President Pu Zoramthanga’n a hawng dawn a ti a, Jubilee lawm kharna hun chu nakum March 1, 2027 ah hman tum a ni tih a sawi bawk.



## KTP GENERAL CONFERENCE

Kristian Thalai Pawl (KTP) General Conference 2026 vawi 61-na chu nizan khan bultan anih hnuah vawiin khan Saitual Public PlaygrounDAH Inkhawm chhhunzawm a ni a, Rawngbawlna Report hrang hrang ngaihthlak a ni.

KTP General Conference vawi 61-na ah hian nimin khan palai nawlpuiin Saitual an pan tan a, vawiinah pawh palai tam tak kal belhin Reception Office chhinchhiah danin Vawiin chhundar 1 thleng khan Palai 20200 chuang an thleng tawh a, zan lam thlengin palai lo dawnsawn hna hi buaipui a ni dawn a ni.

Saitual KTP General Conference thleng tur hian Saitual khaw mipuite an tangrual hle a, Pandal Hlanna inkhawmah pawh hian Presbyterian kohhran mai bakah Seventhday Adventist, ICI, Baptish Church of Mizoram leh Salvation Army-te'n chanvo an nei a ni.

